

COLUMNNA

Essan nus tuttas sgarschavlas reclamunzas u èsi propi talmain catastrofal?

CHATRINA JOSTY-KREUZER

Sch'ins entra en ina stanza da magisters (!), che ha anc adina num stanza da magisters, schebain che 99% da las personas che passentan là lur pausa meritada èn dunnas, sch'ins entra damai en ina stanza da magistras lura aud'ins ina canera bunamain sco ora sin piazza da scola. Igl è in discurrem in tranter l'auter ed oravant tut in grond lamento: Ils uffants n'èn betg pli educads, ins ha da far dapli cun disturbis en classa e problems socials che cun l'instrucziun, il nivel è bass, i dat blers che han disturbis da la lingua e la lavur da geniturs prenda suramaun.

Insumma èn ils geniturs d'ozendi surdumandads cun l'educaziun e tschertgan agid tar nus magistras, ma essan nus responsablas per quai? Era anc per quai? Nus essan gia responsablas per ils dents dals uffants, accumpagnain ils uffants tar il dentist da scola, lavain ils dents cun la pasta da dents speziala cun il fluorid, tar il qual nus stuain l'emprim sclerir, sche quai è en urden per tuts, perquai che questa pasta da dents è figt dispi-



taivla en quartiers verds-urbans (pertge puspè?), nus controllain sch'ils uffants han plugls, nus repartin celds dad uniuns e spiertas per il temp liber dals uffants, nus schliain conflicts socials, nus annunziain uffants che han difficultads a scola tar la psicologa da scola, nus organisain curs e trainings spezials per uffants che han da quels basegns, nus organisain viadis e champs da scola e lura preparain e faschain nus era anc in pau instrucziun. Uff. Oh, quai n'è anc betg tut. Tar nossas incumbensas tutga era anc da'ns scolar vinvant e da'ns participar al svilup da la scola. Hai jau emblidà insatge?

Cler, nus avain era bleras vacanzas. E liber la mesemna suentermezdi. Sche nus n'avain betg discurs, curs, perfecziunament intern, sedutas. Ed ina pajuna enorma avain nus soviso. Quai cumpensescha bain tut!

Pertge mo datti lura in tala mancanza da magistras? E cunzunt da magisters? En il chantun Berna per exempel èn scrittas ora ussa 200 piazzas, las bleras da quellas sin il cumenzament da favrer.

Pertge mo rapportan collegas da gliעד che chala a dar scola gia suenter in onn suenter la scolaziun u suenter curt temp en ina nova piazza – era personas cun grond'experientscha? Jau ves parallelas cun la professiun da tgira: Circumstanzas adina pli difficilas ch'ins ha da dumagnar cun adina pli pauc personal. Cler è: Ils problems na vegn ins betg da schliar cun sa lamentar. Cun ironia forsa era betg – ma l'umor gida a vegnir a frida – enfin che nus avain chattà la soluziun.

Chatrina Josty-Kreuzer lavura sco magistra en il chantun Berna.